

佛說觀無量壽經略講






佛說觀無量壽經略講



## 佛說觀無量壽經略講 大綱圖示





# 佛說觀無量壽經略講

劉宋西域三藏法師 曇良耶舍 譯

## 壹、王宮會

### 一、序分

經文：如是我聞。

【註一】（一）證信序：六成就之信、聞成就

經文：一時。佛在王舍城耆闍崛山中。與大比丘眾千二百五十人俱。菩薩三萬二千。文殊師利法王子。而為上首。

【註二】（二）發起序：六成就之時、主、處、眾成就。

【註三】（1）化前序

經文：爾時王舍大城，

【註】(2)禁父緣——總起化處

經文：有一太子。名阿闍世。隨順調達惡友之教。

【註】(2)禁父緣——世王信惡

經文：收執父王頻婆娑羅。幽閉置於七重室內。制諸群臣一不得往。

【註】(2)禁父緣——世王禁父

經文：國大夫人名韋提希。恭敬大王。澡浴清淨。以酥蜜和麨用塗其身。諸瓔珞中盛葡萄漿密以上王。

【註】(2)禁父緣——夫人奉食



經文：爾時大王。食麩飲漿。求水漱口。漱口畢已。合掌恭敬。向耆闍崛山遙禮世尊。而作是言。大目犍連是吾親友。願興慈悲授我八戒。

【註】(2)禁父緣——因禁請法

經文：時目犍連如鷹隼飛疾至王所。日日如是授王八戒。世尊亦遣尊者富樓那。為王說法。

【註】(2)禁父緣——父王受法

經文：如是時間經三七日。王食麩蜜得聞法故。顏色和悅。

【註】(2)禁父緣——父王法悅

經文：時阿闍世問守門者。父王今者猶存在耶。

【註】(3)禁母緣——問父音信

經文：時守門人白言。大王。國大夫人身塗麝蜜。瓔珞盛漿持用上王。沙門目連及富樓那。從空而來為王說法。不可禁制。

【註】(3)禁母緣——門家具答

經文：時阿闍世聞此語已。怒其母曰。我母是賊。與賊為伴。沙門惡人。幻惑呪術。令此惡王多日不死。即執利劍欲害其母。

【註】(3)禁母緣——世王瞋怒 欲害其母

經文：時有一臣名曰月光。聰明多智。及與耆婆。為王作禮。白言。大王。臣聞毘陀論經說。劫初已來。有諸惡王貪國位故。殺害其父一萬八千。未曾聞有無道害母。王今為此殺逆之事。污刹利種。臣不忍聞。是旃陀羅。不宜住此。時二大



臣說此語竟。以手按劍却行而退。

【註】(3)禁母緣——二臣切諫

經文：時阿闍世驚怖惶懼。告耆婆言。汝不為我耶。

【註】(3)禁母緣——世王生怖

經文：耆婆白言。大王。慎莫害母。

【註】(3)禁母緣——二臣重諫

經文：王聞此語懺悔求救。即便捨劍止不害母。

【註】(3)禁母緣——受諫放母

經文：勅語內官。閉置深宮不令復出。

【註】(3)禁母緣——餘瞋禁母

經文：時韋提希被幽閉已。愁憂憔悴。

【註】(4)厭苦緣——夫人被禁

經文：遙向耆闍崛山。為佛作禮而作是言。如來世尊在昔之時。恒遣阿難來慰問我。我今愁憂。世尊威重無由得見。願遣目連尊者阿難。與我相見。作是語已。悲泣雨淚遙向佛禮。未舉頭頃。

【註】(4)厭苦緣——因禁請佛

經文：爾時世尊在耆闍崛山。知韋提希心之所念。即勅大目犍連及以阿難。從空而來。佛從耆闍崛山沒。於王宮出。時韋提希禮已舉頭。見世尊釋迦牟尼佛。身紫金色坐百寶蓮華。目連侍左。阿難在右。釋梵護世諸天在虛空中。普雨天華持用供養。



【註】(4)厭苦緣——世尊自來 二僧為侍

經文：時韋提希見佛世尊。自絕瓔珞舉身投地。號泣向佛白言。世尊。我宿何罪生此惡子。世尊復有何等因緣。與提婆達多共為眷屬。

【註】(4)厭苦緣——夫人嘆怨

經文：唯願世尊。為我廣說無憂惱處。我當往生。不樂閻浮提濁惡世也。

【註】(5)欣淨緣——通請所求

經文：此濁惡處。地獄餓鬼畜生盈滿。多不善聚。願我未來不聞惡聲。不見惡人。

【註】(5)欣淨緣——舉所厭境

經文：今向世尊五體投地。求哀懺悔。

【註】(5)欣淨緣——夫人懺悔

經文：唯願佛日教我觀於清淨業處。

【註】(5)欣淨緣——通請去行

經文：爾時世尊放眉間光。其光金色。遍照十方無量世界。還住佛頂。化為金臺如須彌山。十方諸佛淨妙國土。皆於中現。或有國土七寶合成。復有國土純是蓮華。復有國土如自在天宮。復有國土如頗梨鏡。十方國土皆於中現。有如是等無量諸佛國土嚴顯可觀。今韋提希見。

【註】欣淨緣——光臺現國 酬前通請

經文：時韋提希白佛言。世尊。是諸佛土。雖復清淨皆有光



明。

【註】(5)欣淨緣——總領所現

經文：我今樂生極樂世界阿彌陀佛所。

【註】(5)欣淨緣——別選所求

經文：唯願世尊。教我思惟教我正受。

【註】(5)欣淨緣——請求別行

經文：爾時世尊即便微笑。有五色光從佛口出。一一光照頻婆娑羅王頂。爾時大王雖在幽閉。心眼無障遙見世尊。頭面作禮。自然增進成阿那含。

【註】(6)散善顯行緣——光益父王

經文：爾時世尊告韋提希。汝今知不。阿彌陀佛去此不遠。汝當繫念諦觀彼國淨業成者。我今為汝廣說眾譬。

【註一】(6)散善顯行緣——答別求行

【註二】阿彌陀佛 去此不遠

經文：亦令未來世一切凡夫欲修淨業者。得生西方極樂國土。

【註】(6)散善顯行緣——舉機勸益

經文：欲生彼國者。當修三福。一者孝養父母。奉事師長。慈心不殺。修十善業。二者受持三歸。具足眾戒。不犯威儀。三者發菩提心。深信因果。讀誦大乘。勸進行者。如此三事名為淨業。

【註一】(6)散善顯行緣——勸修三福

【註二】①世福②戒福③行福——三福淨業



經文：佛告韋提希。汝今知不。此三種業乃是過去未來現在。三世諸佛淨業正因

【註】(6)散善顯行緣——引聖勵凡

經文：佛告阿難及韋提希。諦聽諦聽善思念之。如來今者。為未來世一切眾生。為煩惱賊之所害者。說清淨業。

【註】(7)定善示觀緣——敕聽許說

經文：善哉韋提希快問此事。

【註】(7)定善示觀緣——問當聖意

經文：阿難。汝當受持。廣為多眾宣說佛語。

【註】(7)定善示觀緣——付囑流通

經文：如來今者。教韋提希及未來世一切眾生。觀於西方極樂世界。以佛力故。當得見彼清淨國土。如執明鏡自見面像。見彼國土極妙樂事。心歡喜故。應時即得無生法忍。

【註】(7)定善示觀緣——勸修得益

經文：佛告韋提希。汝是凡夫人心想羸劣。未得天眼。不能遠觀。諸佛如來有異方便。令汝得見。

【註】(7)定善示觀緣——佛力觀成 異方便

經文：時韋提希白佛言。世尊。如我今者以佛力故見彼國土。

【註】(7)定善示觀緣——牒恩生問

經文：若佛滅後諸眾生等。濁惡不善五苦所逼。云何當見阿



中華淨土宗  
彌陀弘願協會

彌陀佛極樂世界。

【註】(7)定善示觀緣——韋提為物



## 二、正宗分

經文：佛告韋提希。汝及眾生。應當專心。繫念一處。想於西方。

【註一】（一定善觀——（1）日想觀

【註二】日觀——總告總勸。

經文：云何作想。凡作想者。一切眾生自非生盲。有目之徒皆見日沒。

【註】日觀——牒所觀事

經文：當起想念。正坐西向諦觀於日。令心堅住。專想不移。見日欲沒狀如懸鼓。

【註】日觀——正教觀察



經文：既見日已。閉目開目皆令明了。

【註】日觀——辨觀成相

經文：是為日想。名曰初觀。作是觀者名為正觀。若他觀者名為邪觀。佛告阿難及韋提希。初觀成已

【註】日觀——總結

經文：次作水想。想見西方一切皆是大水。見水澄清。亦令明了。無分散意。既見水已當起冰想。見冰映徹作琉璃想。此想成已。見琉璃地內外映徹。

【註一】(一)一定善觀——(2)水想觀

【註二】水觀——總標地體

經文：下有金剛七寶金幢。擎琉璃地。其幢八方八楞具足。一一方面百寶所成。一一寶珠有千光明。一一光明八萬四千色。映琉璃地。如億千日不可具見。

【註】水觀——地下莊嚴

經文：琉璃地上。以黃金繩雜廁間錯。以七寶界分齊分明。

【註】水觀——地上莊嚴

經文：一一寶中有五百色光。其光如華。又似星月。懸處虛空成光明臺。樓閣千萬百寶合成。於臺兩邊各有百億華幢無量樂器。以為莊嚴。

【註】水觀——空裏莊嚴

經文：八種清風從光明出。鼓此樂器。演說苦空無常無我之音。



【註】水觀——光音說法

經文：是為水想。名第二觀。

【註】水觀——總結

經文：此想成時。

【註一】（一定善觀——（3）地想觀

【註二】地觀——結前生後

經文：一一觀之極令了了。閉目開目不令散失。唯除睡時。恒憶此事。

【註】地觀——辨觀成相

經文：如此想者。名為粗見極樂國地。

【註】地觀——想心粗見



經文：若得三昧。見彼國地了了分明。不可具說。

【註】地觀——三昧真見

經文：是為地想。名第三觀

【註】地觀——總結

經文：佛告阿難。汝持佛語。為未來世一切大眾欲脫苦者。說是觀地法。

【註】地觀——勸發流通

經文：若觀是地者。除八十億劫生死之罪。捨身他世必生淨國。心得無疑。

【註】地觀——顯觀利益



經文：作是觀者名為正觀。若他觀者名為邪觀。

【註】地觀——辨觀邪正

經文：佛告阿難及韋提希。地想成已。次觀寶樹。

【註一】（一定善觀——（4）寶樹觀

【註二】寶樹觀——結前生後

經文：觀寶樹者。一一觀之作七重行樹想。

【註】寶樹觀——觀相儀則

經文：一一樹高八千由旬。

【註】寶樹觀——樹之體量

經文：其諸寶樹七寶華葉無不具足。一一華葉作異寶色。琉璃色中出金色光。頗梨色中出紅色光。碼碯色中出磳磳光。磳磳色中出綠真珠光。珊瑚琥珀一切眾寶。以為映飾。

【註】寶樹觀——雜樹嚴飾

經文：妙真珠網彌覆樹上。一一樹上有七重網。一一網間有五百億妙華宮殿。如梵王宮。諸天童子自然在中。一一童子有五百億釋迦毘楞伽摩尼寶。以為瓔珞。其摩尼光照百由旬。猶如和合百億日月。不可具名。眾寶間錯色中上者。

【註】寶樹觀——樹上空嚴

經文：此諸寶林行行相當。葉葉相次。於眾葉間生諸妙華。華上自然有七寶果。

【註】寶樹觀——無雜自然



經文：一一樹葉。縱廣正等二十五由旬。其葉千色有百種畫。如天瓔珞。有眾妙華作閻浮檀金色。如旋火輪。婉轉葉間。

【註】寶樹觀——華葉色相

經文：涌生諸果。如帝釋瓶。有大光明。化成幢幡無量寶蓋。是寶蓋中。映現三千大千世界一切佛事。十方佛國。亦於中現。

【註】寶樹觀——果有德用

經文：見此樹已。亦當次第一一觀之。觀見樹莖枝葉華果。皆令分明。

【註】寶樹觀——辨觀成相

經文：是為樹想。名第四觀。作是觀者名為正觀。若他觀者名為邪觀。佛告阿難及韋提希。樹想成已。

【註】寶樹觀——總結

經文：次當想水。欲想水者。

【註一】（一定善觀——（5）寶池觀

【註二】寶池觀——總舉觀名 牒前生後

經文：極樂國土有八池水。一一池水七寶所成。其寶柔軟從如意珠王生。

【註】寶池觀——池數出處

經文：分為十四支。一一支作七寶妙色。黃金為渠。渠下皆以雜色金剛以為底沙。



【註】寶池觀——池溜旋還

經文：——水中有六十億七寶蓮華。——蓮華團圓正等十二由旬。其摩尼水流注華間尋樹上下。

【註】寶池觀——水不思議用

經文：其聲微妙。演說苦空無常無我諸波羅蜜。復有讚歎諸佛相好者。

【註】寶池觀——水不思議德

經文：如意珠王涌出金色微妙光明。其光化為百寶色鳥。和鳴哀雅。常讚念佛念法念僧。

【註】寶池觀——摩尼神德

經文：是為八功德水想。名第五觀。作是觀者名為正觀。若他觀者名為邪觀。

【註】寶池觀——總結

經文：佛告阿難及韋提希。眾寶國土。

【註一】（一定善觀——(6)寶樓觀

【註二】寶樓觀——總舉觀名 牒前生後

經文：一一界上

【註】寶樓觀——寶樓住處

經文：有五百億寶樓。

【註】寶樓觀——一界樓數



經文：其樓閣中有無量諸天。作天伎樂。

【註】寶樓觀——閣內莊嚴

經文：又有樂器懸處虛空。如天寶幢不鼓自鳴。

【註】寶樓觀——樓外莊嚴

經文：此眾音中。皆說念佛念法念比丘僧。

【註】寶樓觀——樂讚念佛

經文：此想成已。名為粗見極樂世界寶樹寶地寶池。

【註】寶樓觀——顯觀成相

經文：是為總觀想。名第六觀。

【註】寶樓觀——總結

經文：若見此者。

【註】寶樓觀——牒前生後

經文：除無量億劫極重惡業。命終之後必生彼國。

【註】寶樓觀——正顯觀益

經文：作是觀者名為正觀。若他觀者名為邪觀

【註】寶樓觀——辨觀邪正

經文：佛告阿難及韋提希。諦聽諦聽善思念之。吾當為汝分別解說除苦惱法。

【註一】(一)一定善觀——(7)華座觀

【註二】華座觀——敕聽許說 除苦惱法



經文：汝等憶持。廣為大眾分別解說。

【註】華座觀——勸發流通

經文：說是語時。無量壽佛住立空中。觀世音大勢至。是二大士侍立左右。光明熾盛不可具見。百千閻浮檀金色不得為比。

【註】華座觀——二尊許應住立空中尊

經文：時韋提希見無量壽佛已。接足作禮。

【註】華座觀——韋提得忍

經文：白佛言。世尊。我今因佛力故。得見無量壽佛及二菩薩。

【註】華座觀——領荷佛恩

經文：未來眾生。當云何觀無量壽佛及二菩薩。

【註】華座觀——為物置請

經文：佛告韋提希。欲觀彼佛者。當起想念。

【註】華座觀——總告許說

經文：於七寶地上作蓮華想。

【註】華座觀——教觀方便

經文：令其蓮華一一葉作百寶色。有八萬四千脈。猶如天畫。一一脈有八萬四千光。

【註】華座觀——寶華莊嚴

經文：了了分明皆令得見。

【註】華座觀——辨觀成相





經文：華葉小者縱廣二百五十由旬。如是蓮華有八萬四千大葉。一一葉間。有百億摩尼珠王。以為映飾。一一摩尼珠放千光明。其光如蓋七寶合成遍覆地上。

【註】華座觀——華葉莊嚴

經文：釋迦毘楞伽摩尼寶以為其臺。此蓮華臺。八萬金剛甄叔迦寶。梵摩尼寶妙真珠網。以為交飾。

【註】華座觀——臺上莊嚴

經文：於其臺上。自然而有四柱寶幢。一一寶幢如百千萬億須彌山。幢上寶幔如夜摩天宮。復有五百億微妙寶珠。以為映飾。

【註】華座觀——幢上莊嚴

經文：一一寶珠有八萬四千光。一一光作八萬四千異種金色。一一金色遍其寶土。處處變化各作異相。或為金剛臺。或作真珠網。或作雜華雲。於十方面隨意變現施作佛事。

【註】華座觀——珠光德用

經文：是為華座想。名第七觀。

【註】華座觀——總結

經文：佛告阿難。如此妙華。是本法藏比丘願力所成。

【註】華座觀——願力成華

經文：若欲念彼佛者。當先作此妙華座想。作此想時不得雜觀。皆應一一觀之。一一葉。一一珠。一一光。一一臺。一一幢皆令分明。如於鏡中自見面像。



【註】華座觀——重顯觀儀

經文：此想成者。滅除五百億劫生死之罪。必定當生極樂世界。

【註】華座觀——結觀成益

經文：作是觀者名為正觀。若他觀者名為邪觀。

【註】華座觀——辨觀邪正

經文：佛告阿難及韋提希。見此事已。次當想佛。所以者何。

【註一】（一定善觀——(8)像觀

【註二】像觀——結前生後

經文：諸佛如來是法界身。遍入一切眾生心想中。

【註】像觀——諸佛應現

經文：是故汝等心想佛時。是心即是三十二相八十隨形好。是心作佛是心是佛。諸佛正遍知海從心想生。

【註】像觀——結勸利益

經文：是故應當一心繫念諦觀彼佛。多陀阿伽度。阿羅呵。三藐三佛陀。

【註】像觀——勸觀彼佛

經文：想彼佛者。先當想像。

【註】像觀——牒前生後

經文：閉目開目見一寶像如閻浮檀金色。坐彼華上。見像坐已。心眼得開。了了分明。見極樂國七寶莊嚴。寶地寶池寶樹行列。諸天寶幔彌覆樹上。眾寶羅網滿虛空中。見如此事



極令明了如觀掌中。

【註】像觀——辨觀成相 像身觀

經文：見此事已。

【註】像觀——結上生後

經文：復當更作一大蓮華在佛左邊。如前蓮華等無有異。復作一大蓮華在佛右邊。想一觀世音菩薩像坐左華座。亦放金光如前無異。想一大勢至菩薩像坐右華座。

【註】像觀——成三身觀

經文：此想成時。佛菩薩像皆放妙光。其光金色照諸寶樹。一一樹下亦有三蓮華。諸蓮華上各有一佛二菩薩像。遍滿彼國。

【註】像觀——成多身觀

經文：此想成時。行者當聞水流光明及諸寶樹鳧鴈鴛鴦皆說妙法。出定入定恒聞妙法。行者所聞。出定之時憶持不捨。

【註】像觀——莊嚴說法

經文：令與修多羅合。若不合者名為妄想。若與合者。名為鹿想見極樂世界。

【註】像觀——辨觀邪正

經文：是為像想。名第八觀。

【註】像觀——總結

經文：作是觀者。除無量億劫生死之罪。於現身中得念佛三昧。作是觀者名為正觀。若他觀者名為邪觀。

【註】像觀——修觀現益 念佛三昧



經文：佛告阿難及韋提希。此想成已。次當更觀無量壽佛身相光明。

【註一】（一定善觀——（9）真身觀）  
【註二】真身觀——正明告命 結前生後

經文：阿難當知。無量壽佛身。如百千萬億夜摩天閻浮檀金色。

【註】真身觀——真佛身相

經文：佛身高六十萬億那由他恒河沙由旬。

【註】真身觀——身量大小

經文：眉間白毫右旋宛轉如五須彌山。佛眼清淨如四大海水青白分明。身諸毛孔演出光明如須彌山。彼佛圓光如

百億三千大千世界。於圓光中。有百萬億那由他恒河沙化佛。一一化佛。亦有眾多無數化菩薩。以為侍者。

【註】真身觀——總觀身相

經文：無量壽佛有八萬四千相。一一相中。各有八萬四千隨形好。一一好中。復有八萬四千光明。一一光明。遍照十方世界。念佛眾生攝取不捨。

【註一】真身觀——觀身別相

【註二】光明遍照之文

經文：其光相好及與化佛。不可具說。

【註】真身觀——結少顯多

經文：但當憶想令心明見。

【註】真身觀——令心眼見



經文：見此事者。即見十方一切諸佛。以見諸佛故名念佛三昧。作是觀者。名觀一切佛身。以觀佛身故亦見佛心。佛心者大慈悲是。以無緣慈攝諸眾生。

【註一】真身觀——觀益得成 彌陀大慈

【註二】普救一切眾生之文

經文：作此觀者。捨身他世生諸佛前。得無生忍。

【註】真身觀——捨身得生

經文：是故智者應當繫心諦觀無量壽佛。觀無量壽佛者。從一相好入。但觀眉間白毫極令明了。見眉間白毫相者。八萬四千相好自然當見。見無量壽佛者。即見十方無量諸佛。得見無量諸佛故。諸佛現前授記。

【註】真身觀——結勸觀益

經文：是為遍觀一切色身想。名第九觀。

【註】真身觀——總結

經文：作此觀者名為正觀。若他觀者名為邪觀

【註】真身觀——辨觀邪正

經文：佛告阿難及韋提希。見無量壽佛了了分明已。次復當觀觀世音菩薩。

【註一】一定善觀——<sup>(10)</sup>觀音觀

【註二】觀音觀——結前生後

經文：此菩薩身長八十萬億那由他由旬。身紫金色。頂有肉髻。頂有圓光。面各百千由旬。其圓光中有五百化佛。如釋迦牟尼。一一化佛。有五百化菩薩無量諸天。以為侍者。舉身光中五道眾生。一切色相皆於中現。



【註】觀音觀——總標身相

經文：頂上毘楞伽摩尼寶。以為天冠。其天冠中有一立化佛。高二十五由旬。

【註】觀音觀——天冠化佛

經文：觀世音菩薩面如閻浮檀金色。

【註】觀音觀——面身異色

經文：眉間毫相備七寶色。流出八萬四千種光明。一一光明。有無量無數百千化佛。一一化佛。無數化菩薩。以為侍者。變現自在滿十方世界。譬如紅蓮華色。

【註】觀音觀——毫光化佛

經文：有八十億微妙光明。以為瓔珞。其瓔珞中。普現一切諸莊嚴事。

【註】觀音觀——身服光瓔

經文：手掌作五百億雜蓮華色。手十指端。一一指端有八萬四千畫。猶如印文。一一畫有八萬四千色。一一色有八萬四千光。其光柔軟普照一切。以此寶手接引眾生。。

【註】觀音觀——手有悲用

經文：舉足時。足下有千輻輪相。自然化成五百億光明臺。下足時。有金剛摩尼華。布散一切莫不彌滿。

【註】觀音觀——足有德用

經文：其餘身相眾好具足。如佛無異。



【註】觀音觀——餘相同佛

經文：唯頂上肉髻及無見頂相。不及世尊。

【註】觀音觀——師徒位別

經文：是為觀觀世音菩薩真實色身想。名第十觀。

【註】觀音觀——總結

經文：佛告阿難。若欲觀觀世音菩薩當作是觀。

【註】觀音觀——結前生後

經文：作是觀者不遇諸禍。淨除業障。除無數劫生死之罪。如此菩薩。但聞其名獲無量福。何況諦觀。

【註】觀音觀——勸觀利益

經文：若有欲觀觀世音菩薩者。當先觀頂上肉髻。次觀天冠。其餘眾相亦次第觀之。悉令明了如觀掌中。

【註】觀音觀——重顯觀儀

經文：作是觀者名為正觀。若他觀者名為邪觀。

【註】觀音觀——辨觀邪正

經文：次觀大勢至菩薩。

【註一】一定善觀——(11)勢至觀

【註二】勢至觀——總舉觀名

經文：此菩薩身量大小亦如觀世音。

【註】勢至觀——次辨觀相



經文：圓光面各百二十五由旬。照二百五十由旬。

【註】勢至觀——正明圓光

經文：舉身光明照十方國。作紫金色。有緣眾生皆悉得見。

但見此菩薩一毛孔光。即見十方無量諸佛淨妙光明。是故號此菩薩名無邊光。以智慧光普照一切。令離三塗得無上力。是故號此菩薩名大勢至。

【註一】勢至觀——光益有緣

【註二】依光立名 依德立名

經文：此菩薩天冠有五百寶華。一一寶華有五百寶臺。一一臺中。十方諸佛淨妙國土廣長之相。皆於中現。

【註】勢至觀——天冠莊嚴

經文：頂上肉髻如鉢頭摩華。於肉髻上有一寶瓶。盛諸光明普現佛事。

【註】勢至觀——肉髻寶瓶

經文：餘諸身相如觀世音等無有異。

【註】勢至觀——餘同觀音

經文：此菩薩行時。十方世界一切震動。當地動處各有五百億寶華。一一寶華莊嚴高顯。如極樂世界。

【註】勢至觀——行異觀音 行時地動

經文：此菩薩坐時。七寶國土一時動搖。從下方金光佛剎。乃至上方光明王佛剎。於其中間無量塵數分身無量壽佛分身觀世音大勢至。皆悉雲集極樂國土。側塞空中坐蓮華座。演說妙法度苦眾生。



【註】勢至觀——坐異觀音 坐時聖現

經文：作此觀者名為正觀。若他觀者名為邪觀。見大勢至菩薩。是為觀大勢至色身想。名第十一觀。

【註】勢至觀——辨觀邪正

經文：觀此菩薩者。除無數劫阿僧祇生死之罪。

【註】勢至觀——修觀利益

經文：作是觀者不處胞胎。常遊諸佛淨妙國土。

【註】勢至觀——重生後益

經文：此觀成已。名為具足觀觀世音及大勢至。

【註】勢至觀——總辨觀成

經文：見此事時

【註一】一定善觀——(12)普觀

【註二】普觀——牒前生後

經文：當起自心生於西方極樂世界。於蓮華中結跏趺坐。作蓮華合想。作蓮華開想。蓮華開時。有五百色光來照身想。眼目開想。見佛菩薩滿虛空中。水鳥樹林及與諸佛。所出音聲皆演妙法。

【註】普觀——作自生想

經文：與十二部經合。若出定時憶持不失。

【註】普觀——定散常憶

經文：見此事已。名見無量壽佛極樂世界。

【註】普觀——觀成之益



經文：是為普觀想。名第十二觀。

【註】普觀——總結

經文：無量壽佛化身無數。與觀世音及大勢至。常來至此行人之所。作是觀者名為正觀。若他觀者名為邪觀。

【註】普觀——三身護念

經文：佛告阿難及韋提希。若欲至心生西方者。

【註一】一定善觀——<sup>(13)</sup>雜想觀

【註二】雜想觀——正明告命 結勸生後

經文：先當觀於一丈六像在池水上。

【註】雜想觀——觀像表真

經文：如先所說。無量壽佛身量無邊。非是凡夫心力所及。

【註】雜想觀——境大心小

經文：然彼如來宿願力故。有憶想者必得成就。

【註】雜想觀——佛力觀成

經文：但想佛像得無量福。何況觀佛具足身相。

【註】雜想觀——比較顯勝

經文：阿彌陀佛神通如意。於十方國變現自在。或現大身滿虛空中。或現小身丈六八尺。

【註】雜想觀——佛像皆真 如意變現

經文：所現之形皆真金色。圓光化佛及寶蓮華。如上所說。

【註】雜想觀——光相同真

經文：觀世音菩薩及大勢至。於一切處身同。

【註】雜想觀——二侍身同



經文：眾生但觀首相。知是觀世音。知是大勢至。

【註】雜想觀——勸觀二別

經文：此二菩薩助阿彌陀佛。普化一切。

【註】雜想觀——三聖宿願


經文：是為雜想觀。名第十三觀。作是觀者名為正觀。若他觀者名為邪觀。

【註】雜想觀——總結

經文：佛告阿難及韋提希。

【註一】(二)散善觀——(14)上輩觀

【註二】上輩生——上品上生——總明告命



經文：上品上生者。

【註】上輩生——上品上生——辨定其位

經文：若有眾生願生彼國者。發三種心即便往生。

【註】上輩生——上品上生——總舉有緣

經文：何等為三。一者至誠心。二者深心。三者迴向發願心。具三心者。必生彼國。

【註】上輩生——上品上生——辨定正因  
經文：復有三種眾生。當得往生。

【註】上輩生——上品上生——正明簡機

經文：何等為三。一者慈心不殺具諸戒行。二者讀誦大乘方等經典。三者修行六念。



【註】上輩生——上品上生——正明受法

經文：迴向發願願生彼國。

【註】上輩生——上品上生——迴向願生

經文：具此功德。一日乃至七日。即得往生。

【註】上輩生——上品上生——修業延促

經文：生彼國時。此人精進勇猛故。阿彌陀如來與觀世音及大勢至無數化佛。百千比丘聲聞大眾無量諸天。七寶宮殿。觀世音菩薩執金剛臺。與大勢至菩薩至行者前。阿彌陀佛放大光明照行者身。與諸菩薩授手迎接。觀世音大勢至與無數菩薩。讚歎行者勸進其心。行者見已歡喜踊躍。自見其身乘金剛臺。隨從佛後。如彈指頃往生彼國。

【註一】上輩生——上品上生——臨終聖接

【註二】上輩生——上品上生——報佛兼化

經文：生彼國已。

【註】上輩生——上品上生——華開遲疾

經文：見佛色身眾相具足。見諸菩薩色相具足。光明寶林演說妙法。聞已即悟無生法忍。經須臾間歷事諸佛。遍十方界。於諸佛前次第授記。還至本國。得無量百千陀羅尼門。

【註】上輩生——上品上生——華開得益

經文：是名上品上生者。

【註】上輩生——上品上生——總結



經文：上品中生者。

【註】上輩生——上品中生——總舉位名

經文：不必受持讀誦方等經典。善解義趣。於第一義心不驚動。深信因果不謗大乘。

【註】上輩生——上品中生——正明受法

經文：以此功德。迴向願求生極樂國。

【註】上輩生——上品中生——迴向願生

經文：行此行者命欲終時。阿彌陀佛與觀世音大勢至。無量大眾眷屬圍繞。持紫金臺至行者前。讚言。法子。汝行大乘解第一義。是故我今來迎接汝。

【註】上輩生——上品中生——臨終聖接

經文：與千化佛一時授手。行者自見坐紫金臺。合掌叉手讚歎諸佛。如一念頃。即生彼國七寶池中。

【註】上輩生——上品中生——去時遲疾

經文：此紫金臺如大寶華。經宿即開。行者身作紫磨金色。足下亦有七寶蓮華。

【註】上輩生——上品中生——華開遲疾

經文：佛及菩薩俱時放光明。照行者身目即開明。因前宿習普聞眾聲。純說甚深第一義諦。即下金臺禮佛合掌讚歎世尊。經於七日。應時即於阿耨多羅三藐三菩提。得不退轉。

【註】上輩生——上品中生——華開得益

經文：應時即能飛至十方。歷事諸佛。於諸佛所修諸三昧。



經一小劫。得無生法忍現前授記。

【註】上輩生——上品中生——他方得益

經文：是名上品中生者。

【註】上輩生——上品中生——總結

經文：上品下生者。

【註】上輩生——上品下生——總舉位名

經文：亦信因果不謗大乘。但發無上道心。

【註】上輩生——上品下生——受法不同

經文：以此功德。迴向願求生極樂國。

【註】上輩生——上品下生——迴向願生

經文：行者命欲終時。阿彌陀佛及觀世音大勢至。與諸菩薩持金蓮華。化作五百化佛來迎此人。五百化佛一時授手。讚言。法子。汝今清淨發無上道心。我來迎汝。見此事時。即自見身坐金蓮華。坐已華合。隨世尊後。即得往生七寶池中。

【註】上輩生——上品下生——臨終聖接

經文：一日一夜蓮華乃開。

【註】上輩生——上品下生——華開遲疾

經文：七日之中乃得見佛。雖見佛身於眾相好心不明了。於三七日後乃了了見。聞眾音聲皆演妙法。

【註】上輩生——上品下生——華開得益

經文：遊歷十方供養諸佛。於諸佛前聞甚深法。經三小劫得百法明門。住歡喜地。



【註】上輩生——上品下生——他方得益

經文：是名上品下生者。是名上輩生想。名第十四觀

【註】上輩生——上品下生——總結

經文：佛告阿難及韋提希。

【註一】（二）散善觀——（15）中輩觀

【註二】中輩生——中品上生——總明告命

經文：中品上生者。

【註】中輩生——中品上生——辨定其位

經文：若有眾生受持五戒。持八戒齋。修行諸戒。不造五逆。無眾過患。

【註一】中輩生——中品上生——正明簡機

【註二】中輩生——中品上生——受法不同

經文：以此善根。迴向願求生於西方極樂世界。

【註】中輩生——中品上生——迴向願生

經文：臨命終時。阿彌陀佛與諸比丘眷屬圍繞。放金色光至其人所。演說苦空無常無我。讚歎出家得離眾苦。行者見已心大歡喜。自見已身坐蓮華臺。長跪合掌。為佛作禮。未舉頭頃即得往生極樂世界。

【註】中輩生——中品上生——臨終聖接



經文：蓮華尋開。

【註】中輩生——中品上生——華開遲疾

經文：當華敷時。聞眾音聲讚歎四諦。應時即得阿羅漢道。三明六通具八解脫。

【註】中輩生——中品上生——華開得益

經文：是名中品上生者。

【註】中輩生——中品上生——總結

經文：中品中生者。

【註】中輩生——中品中生——辨定其位

經文：若有眾生。若一日一夜受持八戒齋。若一日一夜持沙彌戒。若一日一夜持具足戒。威儀無缺。

【註】中輩生——中品中生——簡機受法

經文：以此功德。迴向願求生極樂國。

【註】中輩生——中品中生——迴向願生

經文：戒香薰修。如此行者命欲終時。見阿彌陀佛與諸眷屬放金色光。持七寶蓮華至行者前。行者自聞空中有聲。讚言。善男子。如汝善人。隨順三世諸佛教故。我來迎汝。行者自見坐蓮華上。蓮華即合。生於西方極樂世界在寶池中。

【註】中輩生——中品中生——臨終聖接

經文：經於七日蓮華乃敷。



【註】中輩生——中品中生——華開遲疾

經文：華既敷已。開目合掌讚歎世尊。聞法歡喜得須陀洹。  
經半劫已成阿羅漢。

【註】中輩生——中品中生——華開得益

經文：是名中品中生者。

【註】中輩生——中品中生——總結

經文：中品下生者。

【註】中輩生——中品下生——辨定其位

經文：若有善男子善女人。孝養父母行世仁慈。

【註】中輩生——中品下生——簡機受法

經文：此人命欲終時遇善知識。為其廣說阿彌陀佛國土樂事。亦說法藏比丘四十八願。

【註】中輩生——中品下生——臨終遇法 四十八願

經文：聞此事已尋即命終。譬如壯士屈伸臂頃。即生西方極樂世界。

【註】中輩生——中品下生——臨終聖接

經文：生經七日

【註】中輩生——中品下生——華開遲疾

經文：遇觀世音及大勢至。聞法歡喜得須陀洹。過一小劫成阿羅漢。

【註】中輩生——中品下生——華開得益



經文：是名中品下生者。是名中輩生想。名第十五觀

【註】中輩生——中品下生——總結

經文：佛告阿難及韋提希。

【註一】（二）散善觀——（16）下輩觀

【註二】下輩生——下品上生——正明告命

經文：下品上生者。

【註】下輩生——下品上生——辨定其位

經文：或有眾生作眾惡業。雖不誹謗方等經典。如此愚人。  
多造眾惡無有慚愧。

【註】下輩生——下品上生——簡機造惡

經文：命欲終時遇善知識。為讚大乘十二部經首題名字。以聞如是諸經名故。除却千劫極重惡業。智者復教合掌叉手。稱南無阿彌陀佛。稱佛名故。除五十億劫生死之罪。

【註一】下輩生——下品上生——臨終遇法

【註二】下輩生——下品上生——六字佛名——稱往生

經文：爾時彼佛。即遣化佛化觀世音化大勢至。至行者前。讚言。善男子。以汝稱佛名故諸罪消滅。我來迎汝。作是語已。行者即見化佛光明遍滿其室。見已歡喜即便命終。乘寶蓮華。隨化佛後生寶池中。

【註一】下輩生——下品上生——臨終聖接——稱佛名故

【註二】下輩生——下品上生——諸罪消滅——我來迎汝

經文：經七七日蓮花乃敷。



【註】下輩生——下品上生——華開遲疾

經文：當華敷時。大悲觀世音菩薩。及大勢至菩薩。放大光明住其人前。為說甚深十二部經。聞已信解發無上道心。經十小劫具百法明門。得入初地。

【註】下輩生——下品上生——華開得益

經文：是名下品上生者。

【註】下輩生——下品上生——總結

經文：得聞佛名法名及聞僧名。聞三寶名即得往生。

【註】下輩生——下品上生——重舉行益

經文：佛告阿難及韋提希。

【註】下輩生——下品中生——總明告命

經文：下品中生者。

【註】下輩生——下品中生——辨定其位

經文：或有眾生。毀犯五戒八戒及具足戒。如此愚人。偷僧祇物盜現前僧物。不淨說法無有慚愧。以諸惡業而自莊嚴。如此罪人。以惡業故應墮地獄。

【註一】下輩生——下品中生——簡機造業

【註二】下輩生——下品中生——定入地獄

經文：命欲終時。地獄眾火一時俱至。遇善知識以大慈悲。即為讚說阿彌陀佛十力威德。廣讚彼佛光明神力。亦讚戒定



慧解脫解脫知見。此人聞已除八十億劫生死之罪。地獄猛火化為涼風。吹諸天華。

【註一】下輩生——下品中生——臨終遇法

【註二】下輩生——下品中生——聞名往生

經文：華上皆有化佛菩薩。迎接此人。如一念頃。即得往生。

【註】下輩生——下品中生——臨終聖接

經文：七寶池中蓮華之內。經於六劫。

【註】下輩生——下品中生——華開遲疾

經文：蓮華乃敷。觀世音大勢至。以梵音聲安慰彼人。為說大乘甚深經典。聞此法已。應時即發無上道心。

【註】下輩生——下品中生——華開得益

經文：是名下品中生者。

【註】下輩生——下品中生——總結

經文：佛告阿難及韋提希。

【註】下輩生——下品下生——總明告命

經文：下品下生者。

【註】下輩生——下品下生——辨定其位

經文：或有眾生作不善業五逆十惡。具諸不善。如此愚人以



惡業故。應墮惡道經歷多劫受苦無窮。

【註】下輩生——下品下生——簡機造惡獄報無窮

經文：如此愚人臨命終時。遇善知識種種安慰。為說妙法教令念佛。此人苦逼不遑念佛。

【註】下輩生——下品下生——臨終遇法苦逼失念

經文：善友告言。汝若不能念彼佛者。應稱歸命無量壽佛。

【註】下輩生——下品下生——轉教口稱

經文：如是至心令聲不絕。具足十念。稱南無阿彌陀佛。

【註】下輩生——下品下生——十聲往生

經文：稱佛名故。於念念中。除八十億劫生死之罪。

【註】下輩生——下品下生——六字佛名

經文：命終之時見金蓮華。猶如日輪住其人前。如一念頃即得往生極樂世界。

【註】下輩生——下品下生——臨終聖接金蓮如日

經文：於蓮華中滿十二大劫。蓮華方開。

【註】下輩生——下品下生——華開遲疾

經文：觀世音大勢至以大悲音聲。即為其人廣說實相除滅罪法。聞已歡喜。應時即發菩提之心。

【註】下輩生——下品下生——華開得益

經文：是名下品下生者。是名下輩生想。名第十六觀。

【註】下輩生——下品下生——總結



### 三、得益分

經文：說是語時。

【註】得益分——牒前生後

經文：韋提希與五百侍女。聞佛所說。

【註】得益分——能聞法人

經文：應時即見極樂世界廣長之相。

【註】得益分——光臺見國

經文：得見佛身及二菩薩。心生歡喜歎未曾有。豁然大悟逮無生忍。

【註】得益分——韋提得忍

經文：五百侍女發阿耨多羅三藐三菩提心。願生彼國。

【註】得益分——侍女求生

經文：世尊悉記皆當往生。生彼國已。獲得諸佛現前三昧。

【註】得益分——侍女蒙記

經文：無量諸天發無上道心。

【註】得益分——諸天發心





## 四、流通分

經文：爾時阿難。即從座起。前白佛言。世尊。當何名此經。此法之要當云何受持。

【註】流通分——請發之由

經文：佛告阿難。此經名觀極樂國土無量壽佛觀世音菩薩大勢至菩薩。亦名淨除業障生諸佛前。

【註】流通分——答問經名

經文：汝等受持無令忘失。

【註】流通分——答問受持

經文：行此三昧者。現身得見無量壽佛及二大士。若善男子及善女人。但聞佛名二菩薩名。除無量劫生死之罪。何況憶念。

【註一】流通分——念觀比較

【註二】聞名除罪 何況憶念

經文：若念佛者。當知此人即是人中芬陀利華。

【註一】流通分——絕讚念佛

【註二】芬陀華喻之文

經文：觀世音菩薩大勢至菩薩。為其勝友。當坐道場生諸佛家

【註一】流通分——絕讚念佛

【註二】二聖為友之文



經文：佛告阿難。汝好持是語。持是語者即是持無量壽佛名。

【註】流通分——唯囑持名之文

經文：佛說此語時。尊者目犍連。尊者阿難。及韋提希等。聞佛所說。皆大歡喜。

【註】流通分——聞皆喜躍



## 貳、耆闍會——耆闍分

經文：爾時世尊。足步虛空還耆闍崛山。

【註】耆闍分——（一）序分：步空還山

經文：爾時阿難。廣為大眾說如上事。

【註】耆闍分——（二）正宗分

經文：無量諸天龍神夜叉。聞佛所說皆大歡喜。禮佛而退。

【註】耆闍分——（三）流通分

佛說觀無量壽經略講



中華淨土宗  
彌陀弘願協會





# 中華淨土宗 彌陀弘願協會

書名：佛說觀無量壽經略講

出版：中華淨土宗彌陀弘願協會

地址：臺北市忠孝東路五段508號4樓

電話：(02)2762-1618



虛空念佛堂  
QR-CODE



送行組  
QR-CODE



Line 社群  
QR-CODE



協會IG  
QR-CODE



網址QR-CODE




台北弘願念佛會  
Facebook



高雄弘願寺  
Facebook



You Tobe  
QR-CODE







# 中華淨土宗 彌陀弘願協會

宗旨：

至心專念阿彌陀佛  
信樂極樂深信彌陀  
欲生彌陀安樂淨土  
乃至十念必生安樂

不共願特色：

重願不虛  
衆生稱念  
若不生者  
不取正覺

